

فيليفي

سورت کيريمن هق توهن بري فولوس
توليس کفد فواق المسيح دبندر فيليفي

فولوس دوق تگور فواق المسيح د فيليفي

باب 1

1 اگو ني فولوس ، دغن تیموتیوس ، اورغ هق جاي همب
عیسی المسيح ، هنتر سورت ني کفد فواق مو سموا دبندر فيليفي
سکالي دغن کتوا ۲ دان اورغ فنولوغ کرج دالم فواق مو کاتيق ، هق
جادي ميليق توهن سابيت مو دوق سهاتي سپاوا دغن عیسی
المسيح بلاک .

2 اگو مینتاء توهن باف کیت دغن ربّي عیسی المسيح ، تورو
رحمة اتس فواق مو دغن سلامت سجهترا .

فولوس دوق ایغت کا فواق فيليفي تو سعمور

3 افبیل اگو ایغت کا ادیق برادیق ، اگو اوچف تریما کاسیه کا
4 توهن کو . فس ، گنف ۲ کالي اگو دوق مینتاء دعا انتوق فواق مو
فون ، هاتي کو براس فنوه سوک هاتي .

5 کران جق دماس مولا ۲ مو فرچاي دولو ، هیغک سمفي کا ماس لاني ،
مو فاکت تولوغ اگو ، بري سمفي خبر باءیک حال عیسی المسيح کا
سموا اورغ .

6 فس اكو فرچاي دغن تنتو كات، سموا فركارا موليق هق توهن
مولاي بري جايي دالم ديرى مو، ري تاء فوتوس، هيڭگ سمفي
سمفرن ده، فد هاري عيسى المسيح تورون ماري فول .

7 موليقله اكو براس بالس تو فون، كران اكو فولوس دوق ترايشت
دالم هاتي كوسعمور كا فواق مو، سبب، تكه اكو دوق دالم كوق،
فس دولو فد تو فون، تكه اكو دوق بحس دغن اورغ، بري ري
نمفق كات، خبر يڭ باءيك تو سوڭكوه، فواق مو دغن اكو سام ۲
تريما رحمة هق توهن سعمور.

8 فس توهن تاهو اكو تاء بوهوڭ كات اكو دوق كاسيه، فس دوق
ايشت كا فواق مو سعمور، دغن كاسيه هق تورون درفد عيسى
المسيح .

فولوس مينتاء دعا انتوق فواق فيليفي تو

9 فس اينيله دعا كو انتوق اديق براديق كوسموا. اكو مينتاء
توهن بري فواق مو كاسيه مو اكو كهوور قواة كهوور قواة سعمور
دغن هاتي هق تاهو فركارا مان هق بنر، فس بوليه ارتي كهندق
توهن دالم سموا فركارا تو.

10 بالس توله، مو نق جايي اورغ هق فندي فيليه، هق مان موليق
نق بوات، هق مان تاء موليق، فس هيڭگ سمفي هاري هق
عيسى المسيح نق جايي حاكيم، فواق مو بوليه مڭهانف
ري دغن هاتي اخلاص، تاء ساله اف ۲.

11 فس بالس تو جوگ، فواق مو نق جايي اورغ هق هاتي فنوه دغن
هق باءيك، هق اصل ماري دعيسى المسيح بلاگ، انتوق بري
پات كمليان هق توهن، فس بري سموا اورغ فوجي كا ري.

تاءليه كات روڭي فولوس كنا دوق دالم كوق

12 هي اديق براديق كو! اكو نق بري مو ارتي دغن چرف كات،

- فرکارا هق جايي اتس اکوني، سسوغڱوهڻ تولوغ بري خبر يڻ
 باءِڪ تو کهور مشهور کي لاکي فد دولو.
- 13 کران، لاني، کتوا ۲ عسکر دالم کوت راج سيني، دغن بايق اورغ
 لاکي، تاهو چرف ده کات، اکو کنا ايکت بالس ني سبب اکو
 کرج کا المسيح، تاء ار سبب لائين.
- 14 فس، سا لاکي، سابيت اکو کنا ايکت ني، بري اديق براديق دالم
 فواق المسيح دسيني، بايق اورغ دوق هارف کا ربي عيسي
 کهور قواۃ لاکي، سهيڱڱ دي کهور براني فد دولو، نق توبيت
 کي رويت فرکتان توهن دافن اورغ، دغن تاء تاکوت کا سياف ۲.
- 15 سسوغڱوهڻ، دالم فواق هق براني توبيت کي برشرح کات عيسي
 جايي المسيح هق توهن جنجي تو، ار جوگ اورغ هق نق
 ربوت فريڱت اکو فولوس، نق لاون دغن اکو ساج. تافي ار
 اورغ هق برشرح دغن هاتي باءِڪ جوگ.
- 16 فواق هق هاتي باءِڪ ني فون برشرح کران دي کاسيه کا اکو
 فس، دي تاهو کات توهن بري اکو دوق دالم گوک سيني، نق
 بري اورغ مڱاکو کات خبريڻ باءِڪ تو سوغڱوه.
- 17 تافي فواق سائي تو، توجوان دي لائين. دي برشرح نق ربوت
 فريڱت اکو، نق بري بوليه کا دي. دي گامق کات، دغن بوات
 بالس ني، دي نق بري اکو کهور سوسه، تکه اکو دوق دالم گوک
 دسيني.

فولوس براس سوک هاتي اصل نام المسيح دافت مليا

- 18 تافي بلرله، تاء اف جوگ دي بوات بالس تو. توجوان دي
 موليق اتوا تاء موليق فون، اکو بوليه براس سوک هاتي جوگ.
 کالو بايق اورغ بوليه دغر شراحن چارا حال المسيح. فس اکو
- 19 نق بوليه سوک هاتي لاکي، سبب اکو تاهو کات، دغن دعا هق
 فواق مودوق مينتاء سمعور تو، فس دغن تولوغڻ روح عيسي

المسيح سنديري، اكو نق بوليه لفس رغن سلامت.

20 توجوان هاتي كو، هق اكو هارف سوغكوه ٢ تاء ايغت كافركارا
لاين، ياءيت اكو تاء سير بوات اف ٢ هق بري دييري كو مالو
ماس رافن. تافي لاني سرورف سعمور، اكو نق جاني اورغ
هاتي كوكوه، تاء چارا هيديوف اتوا ماتي فون، اصل نام المسيح
دافت مليا دالم توبوه كو ني.

21 کران تکه اكو هيديوف، اكو هيديوف انتوق المسيح. کالو ماتي
فون، اكو نق بوليه اونتوغ بسر لاکي.

22 تافي ميسل کات تکه اكو روق هيديوف ني، اكو بوليه بوات
لبيه بايق کرج هق ار فائده، فايه سوغکوه نق فيليه، هيديوف
رغن ماتي، هق مان موليق دوا تو.

23 کدوان روق تاريق هاتي کو. سسوغکوهن، اكو براس نق تيغگل
دنيا ني کي رودوق رغن المسيح سعمور. هق تو موليق سگالي.
24 تافي بگکالي، جاني هق لبيه موليق انتوق فواق مو سموا، اكو
رواق هيديوف دالم دنيا ني لاکي.

25 سبب توله، اكو تنتوده نق رودوق سام فواق مو، تاء تيغگل
دنيا لاکي، سابيت نق تولوغ تمبه بري مو کهور سوک هاتي،
کران مو فرچاي کهور قواة لاکي.

26 فس، بيلا اكو ار فلواغ بوليه ماري زياره فواق مو فول، اكو نق
بري مو بوليه فوجي کا المسيح کهور بايق لاکي، کران اكو ماري
تو.

اومة المسيح کنا برديري تکف رغن ساتو هاتي

27 تافي هق مستحق سگالي، فواق مو کنا هيديوف چارا موليق،
چارا هق سوغ فاتوت انتوق اورغ هق تريما ده خبر يغ بايک
هق المسيح تو. بالس توله، اكو ار اتوا تاء فون تاء افله .
تافي ار ساتو فرکارا هق اكو نق رغر سعمور، کات فواق مو

دوق برديري تگف، دغن اد توجوان يځ ساتو. فس، ولو اف ۲ ماري نق بوات خيانه فون، اكونق دغر کات، مو دوق سروف فاکي فنغيس دغن ساتو هاتي، انتوق نق جاگ خبر يځ بآيک هق مو دوق فرچاي تو.

28 جاغن مو تاکوت سترو مو نق بوات بالس ۲ مان فون. کالو مو دوق سروف سبوت سائي، نق جاني تنداکا فواق سترو تو، کات سود سکالي ري نق فونه، فواق مو نق بوليہ سلامت دغن کران توهن دوق سبله مو.

29 کران توهن سوده بري فلواغ بآيک کفد مو، بوکن فرچاي کالمسيح ساج، دق، تافي کنا سوسه، کنا سيقسا کران ري جوگ.

30 دغن کنا سيقسا بالس ني، معنائ مو ماسوق برلاون ده، دغن سترو ۲ توهن، سروف اکو جوگ، هق مو بياس تيغوق ده دولو، فس لاني، مو دغر کات اکو دوق برلاون بالس تو لاگي.

باب 2 اومه المسيح کنا ستوجو دغن فيکيران المسيح

1 اكونق تان ادیق برادیق سيکيت بري ايغت. المسيح سوده بري هاتي مو کوکوہ بوکن؟ فس، سابيت المسيح کاسيه کفد مو، هاتي مو اد سماغت، بوکن؟ فس، کرج روح توهن نق بري مو بوليہ دوق سهاتي مو اکو، بوکن؟ فس، دالم فواق مو مو براس کاسيه کسياغ بلس مو اکو، بوکن؟

2 هي ادیق برادیق کو! بريله اکو فنوه سوک هاتي، فاکيله فرکارا ۲ ني، دوقله دغن فيکيران سجالن مو اکو، دغن کاسيه سام سنديري سوغکوہ ۲، دغن دوق سهاتي، توجوان يځ ساتو سعمور. 3 جاغن مو بوات اف ۲ ايغت کاديري مو ساج، اتوا سابيت مو نق بسر کاديري مو. تافي مو کنا رنده کاديري مو، بوات کاورغ لآين سروف کنف ۲ اورغ فريغکت ري تيغکي فد مو.

4 مو تاء سه جاگ هق موساج، مو کنا بچارا کادیق برادیق مو

گاتيق !

- 5 چارا حال ستوجوان مو اكو دالم فواق مو، مو گنف ۲ اورغ كنا
- 6 ستوجو دغن فيكيران المسيح سنديري. المسيح ني دغن توهن
- 6 جادي هق تولا، تافي المسيح تاء كيرا كات بي كنا فگڻ كا
- فريغت بي دوق سام توهن تو، دق.
- 7 بي تيغل هابيس فريغت بي هق تيغكي تو، سره ډيري بي
- تورون ماري امبيق فريغت هق هينا، يائيت جادي همب، دغن
- كران بي برانق جادي مائسي سروف كيت.
- 8 فس، بيلا جاني مائسي ده، بي فون كهوړ ۲ رنده ډيري بي
- لاكي، دغن طاعة كا توهن هيگ سمفي كنا بونوه ماتي، يائيت
- كماتين يځ هينا دكا يو امفت چابځ.
- 9 سابيت توله، توهن سوده اغكيت عيسي كا تمفت هق مهامليا،
- دغن نام تيغكي سكالې فد نام لائين.
- 10 سهيگ سموا مخلوق هق دوق دلاغيث اتوا ربومي فون، فس
- مخلوق هق دوق باوه بومي فون سروف، كنا ماري سجود حرمة
- كا عيسي كران نام بي تيغكي كيتو لالو.
- 11 فس سموث نق كنا مځاكو كات عيسي المسيح جادي ربّي.
- بالس توله، بري پات كمليان توهن باف.

انق ۲ توهن كنا دوق سوچي دالم دنيا هق گلف

- 12 سابيت توله، هي اديق براديق كو هق اكو كاسيه! مو كنا
- كاچځ طاعة كا توهن سروف سعموړ. بوكن تكه اكو دوق ار
- سكالې دغن موساج، دق. اكو سوروو مو طاعة كهوړ قوا، كهوړ
- قوا لاكي، كران اكو تاء ده. مو كنا تبېځ كرجاله، دغن تاكوت،
- دغن كتر كئالېځ، انتوق نق بري ډيري مو سلامت سمفرن.
- 13 كران توهن دوق بوات كرج بي دالم هاتي مو گاتيق، نق بري
- مو كهندق نق طاعة، فس بوليه طاعة، سموا هق ري بركن.

- 14 سما فرکارا هق مو دوق بوات فون مو کنا بوات دغن سوځگوه ۲ هاتي. مو جاغن دوق مغيقيق، جاغن دوق برسوځوت تان ۲
- 15 سمعور، باروله مو نق جاي اورغ سوچي، دالم اتوا لوار، هق اورغ لائين تالیه نمفق کات ساله، انق ۲ توهن هق سمفرن، ولو مو دوق دتغه مائسي هق هاتي بيلق، هق درهاک کا توهن فون. تافي مو کنا دوق دالم فواق دي تو، سروف
- 16 بيندغ ۲ دلاغيث دوق سولوه دالم تمفت گلغ، تکه مو دوق رويت بري چرف کا فواق ۲ تو، خبر يغ بائیک هق بوليه بري دي هيذوف چارا بارو. کالو مو دودوق بالس ني فون، بيلا سمفي ده هاري هق المسيح نق ماري فول تو، فواق مو نق جاي تندا، کات کرج کو دغن اوسها کو تو، تاء سيا ۲.
- 17 بځکالي دکت نق سمفي ماس هق داره اکو، فولوس ني، کنا تومغه توبيت. فواق مو دوفيليفي فون دوق سره ديزي کا توهن جوگ، نق بوات کرج کا دي کران مو فرچاي کا دي. فس، کالو اکو دغن سره پاوا کو، بوليه تولوغ بري سمفرن کرج مو تو، اکو نق براس سوک هاتي سابيت فواق مو.
- 18 فس، فواق موفون، سوغ فاتوتله براس سوک هاتي سابيت اکو کاتيقي.

خبر چارا حال اديق براديق هق باليق فولوس

- 19 اکو دوق هارف کا ربي عيسي کات، تاء لام لاکي دي بري اکو بوليه هنتر اديق کيت تيموتيوس کي کا تمفت مو، فس بيلا دي کليق ماري دسيني فول، دي نق باوا خبر اديق براديق باليق مو بري اکو دغر، بري هاتي کو کهور قوا لاکي.
- 20 تيموتيوس سئورغ ساج هق براس سروف اکو ني. اورغ لائين تاء، هق امبيق فدولي کا فواق مو سوځگوه ۲. کران سما اورغ
- 21 نمفقش، دوق فادول کا کرج دي سنديري، تاء فادول کا کرج

- 22 عيسى المسيح . تافي فواق مو تاهو ده ، تيموتوس ني اورغ هق اكو هارف سوغكوه . دي بياس كرج دغن اكو سروف انق دغن باف ، نق بري خبر بائيك تو مشهور كي سرات ۲ تمفت .
- 23 سبب توله ، بيلا اكو دغر نق جاتوه بالس مان اتس اكو دسيني ، اكو فون نق هنتر دي كي بري تاهو كا فواق مو سلالو . فس ،
- 24 اكو دوق هارف كا ربي كات ، تاء لام لاكي اكو سنديري نق بوليه كي كا تمفت فواق مو جوگ .
- 25 تافي لاني ، فد فيكيان اكو ، موليقله اكو سوروه ايفافروديتوس كي كا فواق مو دولو . دي سروف ادیق كو هق كرج سكالی دغن اكو لام ده ، سروف كيت كدوا جاني عسکر ، هق سام ۲ دوق فرغ انتوق توهن . دي جاني فسوروه هق فواق مو ديليفي هنتر ماري دولو نق سوکوڤ اكو دسيني .
- 26 فس لاني دي دوق ترايغت ۲ كا فواق مو ، نق تموفول . دي براس سراپوت فروت سوغكوه ، کران دي تاهو ده کات ، فواق مو ديق نون سوده دغركات دي ساكيت تروق دسيني . فد ماس تو
- 27 سوغكوه دي دوق ساكيت تروق ، دكت نق ماتي . تافي توهن كسياغ بلس كا دي ، فس كا اكو گاتيقي . کران توهن تاء سير بري تمبه كسوساهن كو كهوړ برت لاكي .
- 28 سابيت توله ، اكو براس كهوړ گادوه نق هنتر ايفافروديتوس كي كا فواق مو باغت ۲ ، نق بري مو براس سنغ هاتي دغن تيغوق مات دي فول . اكو فون نق بوليه هيلغ فراسان بيمبغ اكو چارا حال فواق مو جوگ .
- 29 سابيت توله اكو سوروه ادیق برادیق سمبوت ايفافروديتوس ني دغن سوک هاتي ، هق سوغ فاتوت انتوق اورغ هق جاني ميلیق ربي عيسى . مو کنا بري حرمة کا دي ، فس کا اورغ هق بوات سروف دي . کران تکه دي بوات كرج كا المسيح تو ، دي تاء ساينغ
- 30 کا پاوا دي ، سهيگگ سمفي دکت نق ماتي . هق دي بوات تو

فون، سبب دي جادي واكيل فواق مو، هق مو هنتر ماري نق
تولوغ اكو، فولوس ني.

فرکارا هق ار هرگ مهل سکالي

باب 3

- 1 هي اديق براديق کو! فسنن کو هق سود سکالي کا فواق مو، مو
کنا دوق سوک هاتيله، کران مو جاي ميليق ربي عيسی ده. اکو
راجين نق براولغ ۲ رويت سموا فسنن ني، کران اکو نق بري
فواق مو دوق موليق.
- 2 مو کنا جاگ باءیک ۲ له، جاغن بري اورغ ماسوق دالم فواق مونق
بوات جاهت، سروف سوروه اورغ کنا برسونت بارو بوليه کات
سلامت. فراغي اورغ ني تاءلائين فد انجيغ!
- 3 سبب کيت له هق توهن کات ار تندا برسونت سوغکوه. کيت
هق سمبه کا توهن دغن کواس روح توهن دالم هاتي، هق
دوق برسوک ۲ هاتي سبب کيت جاي ميليق المسيح، هق تاء
کنا هارف کا اتوران مان ۲ انتوق توبوه.
- 4 کالو کنا هارف کا اتوران لوار کات نق بوليه سلامت، تنتو اکو
فولوس ني ار سبب نق بوليه سلامت تو، لبیه فد اورغ ۲ لائين
لاکي. کران سمفي عمور لافن هاري ده، اکو کنا برسونت سيف
ده، تنداکات اکو دوق دالم بغسا اسرائیل. فس، اکو کتورون
درفد بنجامين، هق جاي انق چوچو سجاتي توءنينيق کيت،
ابراهيم. اکوني کتورون اورغ عبراني سجاتي. کالو نق رويت
حال اوکام فون، اکو جاي فريسي، فواق هق فکغ اوکام قواة
سکالي. فس، نق رويت حال هاتي فول، دولو اکو راجين
- 6 سوغکوه، بوات پان کا فواق ۲ المسيح. فس کالو ار جالن نق
بتول دنداغن توهن دغن توروت حکوم ۲ دالم کتاب، اکوله
بتول تاءساله اف ۲.
- 7 تافي سموا فرکارا ني، هق دولو اکو نمفق کات فهلا بايق،

- لاني ، كالو بنديغ دغن المسيح ، هق اكو كيرا تو روکي ساج .
 فس بوکن فرکارا ۲ تو ساج ، هق اكو کيرا کات روکي . سموا فرکارا 8
 لاین فون روکي جوگ ، کالو کنل سوغکوه دغن عیسی المسيح
 ربی کو . جاي دیاله هق اد هرگ مهل سکالي انتوق اکو .
 سسوغکوهن اکو بواغ بلاک ده ، سموا فرکارا لاین تو ، کیرا
 کات سرورف سمفه ، اصل بولیه تریمای المسيح گنتي ، فس بولیه
 دوق سمهاتي دغن بي . اکو تاء سیر کرج کاچغ توروت حکوم ۲ 9
 دالم کتاب ، بري بولیه توهن کات اکو تاء ساله ده . لاني ،
 توهن کات اکو تاء ساله ده ، کران اکو فرچاي کا المسيح .
 توهنله هق بري جاي تاء ساله ني کوء جالن فرچاي تو .
 کهندق هاتي کولاني ، اکو نق کنل کهور ۲ مولیق لاکي دغن 10
 المسيح ، اکو نق تریمای کواس دتوهن ، کواس هق دي تورون
 بري عیسی هیدوف کلیق تو ، فس اکو جوغ توروت کسیقسائ
 هق سرورف المسيح جوگ ، ولو کنا ماتي سرورف دي فون ،
 اصل اکو بولیه هیدوف کلیق سوغکوه ۲ ، سرورف دي . 11

فولوس دوق کاچغ نق بري بولیه هدیه

- بوکن کات اکو بولیه ده ، کهندق کو ني ، نق ! بوکن کات 12
 اکو بوات دغن سمفرن ده ، سموا فرکارا ، دق ! تافي ، سرورف
 اکو دوق تیواس لاکي ، نق ربوت هدیه تو بري جاي میلیق
 کو ، کران عیسی المسيح سوده فیلیه اکو بري جاي میلیق بي .
 هي ادیق برادیق کو ! اکو تاء لیه کات لاکي ، لاني سموا فرکارا 13
 ني دوق دالم گنکم تاغن کو ، دق . تافي اکو دوق توجو کوء
 تو سممور ، تاء اد توجو کوء لاین . اکو تاء ایغت کا هق
 بالیق بلاکغ ، تافي اکو کاچغ نق بري سمفي کا هق اکو دوق
 توجو تو . سرورف اکو دوق تیواس نق ربوت بندیرا تو ، نق 14
 بري بولیه هدیه ، کران این توجوان توهن دغن فغگیل کیت

سوروه تريما ، کوء جالن فرچاي کا عيسى المسيح .

کنا توروت چنتوه هق فولوس بري ده

- 15 سابيت توله ، کيت هق چوکوف فرچاي سکت هق کيت تاهوده لاني ، موليق کيت فاکت ستوجو دغن سموا فرکارا هق اکو بارو رويت سائي . کالو ادیق برادیق تاء ستوجو بالس تو لاگي ، ننتي توهن نق بري مو ارتي جوگ .
- 16 تافي کيت گنف ۲ اورغ کنا بوات توروت فرکارا ۲ هق کيت ارتي ده ، سمفي سکت ني .
- 17 يا ادیق برادیق کو ، تبیغله توروت چنتوه کو . اکو بري ده چنتوه بتول انتوق فواق موسما . سبب توله ، اورغ مان ۲ فون هق بوات توروت چنتوه تو ، مو کنا فرهاتي تیغوق کا دي گاتیق . کران اد جوگ بايق اورغ هق توروت جالن لاین ، سروف
- 18 اکو بیاس رويت اچف کالي ده کا ادیق برادیق . فس لاني فون اکو نق رويت سکالي لاگي ، دغن براس برت هاتي کات ، فواق ۲ تو جاني سترو دغن جالن هق توهن فیلیه نق بري مائسي سلامت ، یاءيت جالن المسيح کنا ماتي فد کايو امفت چانغ هق هینا تو .
- 19 سود سکالي ، توهن نق جاتوه حکوم اتس فواق هق جاي سترو ني ، بري بناس ، سابيت دي توروت هاتي دي سندیري ، گنتي توهن . فس لاگي ، هق فاتوت دي کنا مالو ، دي امبيق فاکي فرکارا تو نق بري ديري دي جاي مليا . فس هق مناریق هاتي دي فون ، فیکیران هق ماري مائسي سندیري ، بوکن هق ماري دتوهن .
- 20 تافي فواق کيت ني جاي رعیت نکري شرک ده . فس کيت دوق ننتي جوړو سلامت کيت ، ربّي عيسى المسيح ، هق نق تورو
- 21 ماري دشرک تو . بیلا دي تورو ماري ده ، دي نق براوبه تبوه

بدان کيت هق هينا ني، نق بري جادي هق مليا، سروف
توبوه هق دي. بي ار کواس نق بوات بالسي ني، کران سمو
فرکارا هق ار، کنا دوق باوه فرينته دي بلاک.

فسنن فولوس کا اديق براديق دبندر فيليفي

باب 4

- 1 هي اديق براديق کو، هق اکو کاسيه سوغکوه، هق اکو دوق
ترايغت ۲ نق تمو سعمور، هق بري اکو فنوه سوک هاتي، هق
جادي تندا کرج کو برجاي تاء ۲ سيا ۲ ده. مو کنا برديري تگفله
دالم ليغکوغن ربّي عيسى.
- 2 فس لاني اکو نق مينتاء جوگ ۲ چي ايوديا دغن چي سينتيحي،
بري بائک سمولا، کران کدوا جاي اديق براديق کريستين.
- 3 فس، اديق کو هق بياس دوق کرج رافت دغن کو سوغکوه، اکو نق
مينتاء اديق تولوغ دوا اورغ ساءني کاتيقي. کران بي بياس کرج
سکالي دغن کيت جوگ، سروف کليمين دغن اديق براديق لائين ۲
لاکي، سموا تو هق بياس کرج سام اکو، نق بري خبر يغ بائک
تو برجاي ديق نون. سموا اورغ ني، نام دي توليس ده دالم
بنجي نام اورغ هق هيديوف چارا بارو.
- 4 هي اديق براديق کو! مو کنا دوق برسوک ۲ هاتيله سعمور،
کران مو جادي ميليق ربّي عيسى ده. اکو سوروه مو سکالي لاکي،
مو کنا دوق برسوک هاتيله!
- 5 مو کنا بري سموا اورغ نمفق کات مو جادي اورغ لمه لمبوت.
ايغتله، تاء لام لاکي ربّي عيسى نق تورون ماري فول.
- 6 مو تاء سه بيمغ اف ۲ له هق نق جادي. تافي دالم سموا دعا
مو مينتاء له کا توهن اف ۲ هق مو دوق کورغ، دغن اوچف
تريما کاسيهله کا دي سعمور.
- 7 فس توهن نق جاگ هاتي دغن فيکيران فواق مو، بري سنغ
سوگکوه، سنغ بايق فد هق ماءنسي بوليه ارتي، کران مو دوق

سهاتي سپاوا دغن عيسى المسيح سعمور.

- 8 فس، هق سود سكالني، دغرله اديق براديق كو! مو كنا تيمبغله، هق مان سوغكوه، هق مان سوغ فاتوت نق حرمة، هق مان عاديل، هق مان سوچي، هق مان بري اورغ كات باءيك هق مان بري اورغ نق كونجوغ، سموا فركارا هق موليق سكالني، هق اورغ سموا نق فوجي، بري فيكييران مو توجو كوء توله!
- 9 فس اف ۲ هق اكو بياس دوق اجر، اف ۲ هق مو بياس تريما ده درفد كو، فركارا مان مو نغر اتوا تيغوق اكو بوات تو، مو كنا بوات توروتله بلاك. فس، توهن هق بري هاتي كيت سنغ سوغكوه، دياله نق دودوق سالم مو سعمور.

فولوس اوچف تريما كاسيه كا فواق فيليفي

- 10 لاني ربّي عيسى بري اكو سوک هاتي سوغكوه، کران لام ده، اديق براديق باليق مو تاءاد فلواغ نق تولوغ اكو، تافي لاني بوني مو بارو کمبغ سمولا. بوکن کات اديق براديق تاءايغت کا اكو، بق. تافي تکه دولو تو، مو تاءاد فلواغ نق تنجوق بوني مو کا اكو.
- 11 اكو تاءاسير کات اكو دوق کورغ فد ماس تو، بق! جاتوه بالس ۲ مان فون کا اكو، اكو سوده اجر ديري کو، بوليه دودوق دغن
- 12 فواس هاتي سمات. کالو کورغ فون اكو بوليه دودوق. لبيه فون، اكو بوليه دودوق جوگ. جاني بالس ۲ مان فون، تاءاف. تاءچوکوف نق ماکن، اتوا ماکن کيغ فون، تاءافله، اد تاءاد فون سروف تولا.
- 13 کران اد ساتو رهسيا هق اكو سوده اجر ديري کو. ياءيت اكو بوليه هادف سموا فرکارا ني، تاءاد سکارا هق اكو تاءليه بوات سابيت اكو دوق سهاتي سپاوا دغن المسيح، سبب دياله هق بري کواس کعد اكو.

- 14 سوڱوڻه فون اڪو اجر ڊيري بالس ني، تافي هق فواق مو دوق
تولوڻ اڪو دالم ڪسوساهن اڪو ني موليق سوڱوڻه.
- 15 فواق مو دوفيليفي فون تاهو ده کات، فد ماس دولو، بيلا اڪو
مولا ۲ ڪرڇ ميمفي خبريڻ ٻاءِڪ کا فواق مو ديق نون، فس،
تيڱگل نڪري ماڪدونيا تو، تاءِ فواق المسيح دمان ۲ فون
ملينڪن فواق مو ساج، هق ڪيرا کات اڪو ني ڪنا فاکي دويت،
فس فواق موله هق فاڪت تولوڻ بري کا اڪو.
- 16 فس، تکه اڪو دوق برهنتي ريندر تيسالونیکا لاکي، مو هنتر
دويت ماري روا تيڱ کالي جوڳ، نق سارا اڪو دسيتو.
- 17 بوڪن کات اڪو دوق ننڍي نق تريما هديه مو تو، دق. ڪهنڊق
هاتي ڪو، نق بري فواق مو ڪهور ۲ تريما حاصلن درفد توهن،
جادي بالسڻ سموا بوني مو. فس هديه ۲ هق فواق مو
- 18 ڪيريم ماري کا اڪو دغن ايفافروڊيتوس تو فابن سڪت تو، چوڪوف
ده. اڪو تاءِ ڪورڱ اف ۲، اد لبيه. هديه تو، ميسل سروف دغن
اسف ڪمين، هق ناءِڪ سمفي کا توهن، اتوا سروف دغن قربان
هق توهن برڪن.
- 19 فس، توهن ڪو، ستارا مان لبيه ڪکياڻ دي هق توروڻ کا ڪيت
ڪوٽ جالن عيسيٰ المسيح، ستارا تو جوڳ دي نق بري چوڪوف کا
فواق مو، اف ۲ هق مو دوق ڪورڱ.
- 20 فوجيله ڪملياڻ توهن باف ڪيت، بوات سلام ۲، امين.
- 21 اڪو ڪيريم ڪاسيه کا اديق براديق ڪنف ۲ اورڱ، هق جادي
ميليق المسيح باليق مو. اديق براديق هق دوق سڪالي دغن اڪو
دسيني فون، ڪيريم ڪاسيه کا فواق مو جوڳ. فس سموا هق جادي
- 22 ميليق المسيح باليق اڪو ني، سمفي کا اديق براديق هق دوق دالم
ڪوت مهاراج روم فون، ڪيريم سلام کا فواق مو بلاڪ.
- 23 اڪو مينٽا بري رحمة ربي عيسيٰ المسيح دوق دالم هاتي فواق مو
سموا!